

Menjelang PRK Kuala Besut, Hadi gesa pengundi celik IT
Malaysian Insider
July 19 , 2013
Oleh Mohd Farhan Darwis

Pengundi di Kuala Besut perlu belajar daripada masyarakat bandar yang celik internet dan mempunyai kesedaran politik dengan memilih Pakatan Rakyat (PR), kata Presiden PAS, Datuk Seri Abdul Hadi Awang (gambar).

Abdul Hadi ketika menyampaikan ceramahnya di Kuala Besut malam tadi berkata golongan celik internet yang menetap di bandar majoritinya menolak Umno dan Barisan Nasional (BN), yang mana perlu dijadikan contoh oleh pengundi di kawasan berkenaan.

"Orang Kuala Besut belajar daripada mereka yang terpelajar. Mereka yang celik internet tolak BN, belajar daripada mereka," kata Abdul Hadi di hadapan 500 penyokong parti Islam berkenaan dalam kempen Pilihan Raya Kecil (PRK) Dewan Undangan Negeri (DUN) Kuala Besut yang dijadualkan 24 Julai depan.

Ahli Parlimen Marang itu turut mengemukakan contoh trend Pilihan Raya 2013 yang membuktikan sokongan golongan celik internet dan teknologi maklumat memihak kepada pembangkang.

"Kita berjaya menerangkan melalui media baru. Orang celik internet tidak sokong Umno," katanya, dan menambah, pembangkang juga berjaya menerima undi daripada golongan terpelajar.

"Di Terengganu, semua kawasan bandar kita menang, Kuala Terengganu, Dungun, semua kita menang. Tapi kawasan Kuala Besut, kita kalah ... kita tak salahkan orang Kuala Besut, masing-masing sibuk dengan urusan ke laut, tidak sempat buka internet," katanya.

Mengulas lanjut berhubung kedudukan kerusi DUN yang dianggap kritikal di Terengganu, veteran PAS itu menjelaskan pihaknya mahukan kedudukan seri 16:16 antara PAS dan BN di negeri Darul Iman itu bagi menegur kepimpinan BN, dan bukannya mengharapkan kedudukan menteri besar.

"(Umno) beri kita 16 kerusi, mereka 16, biar seimbang. Biar dia jadi MB, kita nak 16 kerusi, apa kaedahnya? Kita boleh tegur dia (Umno) ... benda tidak molek kita boleh bangkang, benda betul kita sokong, baru kita ada kekuatan betulkan kerajaan BN," katanya.

Kerusi DUN Kuala Besut menjadi kerusi pertama diadakan PRK selepas kematian penyandang Dr Ab Rahman Mokhtar dari BN yang memenangi kawasan berkenaan selama dua penggal.

Suruhanjaya Pilihan Raya (SPR) menetapkan pengundian awal pada hari ini di Pangkalan Tentera Udara (TUDM) Gong Kedak, sementara pilihan raya akan berlangsung pada 24 Julai.

PAS mempertaruhkan calon daripada ahli perniagaan Endut@Azlan Yusof, manakala BN meletakkan golongan profesional Tengku Zaihan Che Ku Abd Rahman, di mana kedua-duanya anak jati Kuala Besut.

BN sebelum ini memenangi 17 kerusi daripada 32 kerusi DUN di Terengganu, dengan baki

masing-masing 14 milik PAS, dan satu PKR. - 20 Julai, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pengundi-kuala-besut-perlu-celik-it-kata-abdul-hadi>